

四庫全書

史部

欽定四庫全書

皇朝文獻通考卷二百三十八

經籍考

二十八

集

總集

練音集補七卷

國朝練音集十二卷

王輔銘編輔銘字翊思嘉定人

臣等謹按明翟校以嘉定代有作者而詩篇多散

逸遂采宋天聖以迄明弘治合為一編嘉定本古  
之練和市因名曰練音集後板燬於倭僅存鈔本  
輔銘以其遺闕尚多重加采補又選

國朝詩人之作另為一集云

金華文畧二十卷

王崇炳編崇炳見史類

例畧曰是書取金華文徵十之五金華文統十之  
二而益以他書十之三又曰文統之例凡論及兵

機政術及為釋氏而作者不錄

毛奇齡序曰金華自顏烏許攸以後多忠孝節烈之士而各有文章在唐則駱丞最著而舒侍郎與馮節度繼之顧專以詩名至宋元迄今則道學如呂伯恭史學如陳同甫以及元之金許明之王宋輝煌彪炳指不勝屈然金文未易輯而從前若文統文憲文徵發書類又多所闕軼崇炳起而選之又得唐中舍為之校錄云

尺牘新語二十四卷

徐士俊汪淇同編士俊字野君錢塘人淇見子類  
蕉雨軒詩餘彙選八卷

陳澍選澍字雨夏嘉興人歲貢生

東白堂詞選初集十五卷

佟世南編世南字梅岑遼陽人

名家詞鈔

無卷數

聶先編先字晉人廬陵人

林下詞選十四卷

周銘選銘字勒山松江人

說唐詩二十二卷

徐增撰增字子能長洲人

百名家詩選八十九卷

魏憲編憲字惟度福清人

皇清詩選三十卷

孫鉉編鉉字思九江南華亭人

例畧曰論詩者必規摹初盛誠類優孟衣冠然使  
挾其佻巧之姿曼音促節以為得中晚之秘則風  
斯下矣又曰數年以來又家南山而戶劍南矣在  
彼天真爛漫畦徑都絕此誠詩家上乘倘不衫不  
履面目頽唐或大袖方袍迂濶可厭輒欲奪宋人  
之席幾何不見絕於七子耶

國雅初集

無卷  
數

陳允衡編允衡見史類

宋詩刪二十五卷

顧貞觀編貞觀字華封無錫人由監生考授秘書院中書中康熙丙午舉人遷典籍

歷朝賦格十五卷

陸萊編萊字義山平湖人康熙丁未進士授內閣典籍已未

召試博學鴻詞改翰林院編修官至內閣學士兼禮部侍

郎



續垂棘編三集十卷四集九卷

范鄩鼎編鄩鼎見史類

臣等謹按鄩鼎父芸茂嘗選輯山西之文二十卷

題曰晉國垂棘鄩鼎因依例彙輯其鄉近人之文以續之前後共為四集今僅存者惟三四兩集焉

傳是樓宋人小集

無卷數

不著編輯者名氏

戴范雲跋曰是崑山徐氏所輯故仍題之曰傳是

樓宋人小集

榕村講授三卷 古文精藻二卷

李光地編光地見經類

羣雅集十二卷

李振裕編振裕見別集類

瑞竹亭合稿四卷

王愈擴及其弟愈融撰愈擴字若先泰和人康熙  
庚戌進士愈融字侶新諸生

全唐詩錄一百卷

徐倬編倬見別集類

聖祖仁皇帝御製序曰在昔詩教之興本性情之微導中和之旨所以感人心而美謠俗被金石而格神祈故大舜以教胄子樂正以造俊秀蓋自二帝三王之世固已然矣文武成康之際王澤洽頌聲作洋洋乎洵足以繼薰風之操並卿雲之奏也自時厥後作者彌繁孔子從而刪定之使六義彰明一經燦列錄其忠厚悱惻之辭

以寓諷諭戒勉之意天道人事胥於是乎具焉漢魏以  
還尤多新製體例雖更前徽未邈至陳隋之末稍凌替  
矣唐之太宗致治幾於三代之隆躬自撰著一時文人  
才士將相名臣咏吟遞發藻采繽紛踵襲雅騷之迹光  
昭正始之音而歌行律絕獨創兼能自遐古以來未嘗  
有也爰及盛唐逮乎中晚或與運會為高下而凡緣時  
託志觸物攄懷形諸翰簡者皆卓然成一家之言弗可  
廢也朕萬幾餘閑迴環覽詠尋其指歸晰其正變而三

百年升降得失之故亦因可以考焉於是論世觀人即其章句攬其菁英勒為成書置諸几席每勤披閱加以精研迄於今已歷有年所矣頃以視河南巡至於江浙見此閭士庶有吹幽擊壤之風獻詩頌者絡繹於途雖其工拙淺深各極其不齊之致而衢謳巷舞儼然省方之所採列國之所陳亦可見人情之愛戴而先王以詩為教之義濡染而蒸陶之者所關甚鉅也翰林侍讀徐倬以全唐詩錄進展卷而讀之與朕平時品第者蓋有

合焉嘉其髦年好學遷秩禮部侍郎以為天下學者之  
勸乃取茲集親為鑒定賜以帑金即命校刊俾誦習者  
由全唐之詩沿波討瀾以上溯夫汾泗之傳而游泳乎  
唐虞載賡之盛其於化理人心將大有裨益也矣是為  
序以弁其端云

臣等謹按康熙丙戌

聖祖仁皇帝南巡倬繕錄此編進

呈

御覽得

旨嘉獎由侍讀

特擢禮部侍郎併為

御製序文

賜帑刊板儒臣榮遇實為千古所莫及至今傳為盛事其

書較

御製全唐詩先一年成故編次頗有不合云

洛如詩鈔六卷 明詩綜一百卷 詞綜三十卷

朱彞尊編彞尊見史類

彞尊自序明詩綜曰合洪武及崇禎詩甄綜之上  
自帝后近而宮壺宗潢遠而蕃服旁及婦寺僧尼  
道流幽索之鬼神下徵諸謠諠入選者三千四百  
家或因詩而存其人或因人而存其詩間綴以詩  
話述其本事期不失作者之旨

汪森序詞綜曰彞尊輯唐以來迄元人所為詞凡  
一十八卷後彞尊北遊南至白下逾三年歸廣為



二十六卷而森亦往來苕霅間從故藏書家鈔白  
諸集相對參論復益以四卷凡三十卷計覽宋元  
詞集一百七十家傳記小說地志共三百餘家歷  
歲八稔然後成書庶幾一洗草堂之陋而倚聲者  
知所宗矣

漢詩音注五卷漢詩評五卷

李因篤撰因篤見詩集類

詩觀十四卷別集二卷

鄧漢儀編漢儀字孝威泰州人康熙己未

召試博學鴻詞以年老授中書舍人

浙西六家詞十卷

不著編輯者名氏

朱子論定文鈔二十卷

吳震方編震方見經類

粵西詩載二十五卷粵西文載七十五卷粵西叢

載三下卷

汪森編森字晉賢桐鄉人休寧籍官桂林府通判

鳳池集

無卷數

沈玉亮吳陳琰同編玉亮字瑤岑武康人陳琰見

經類

續三體唐詩八卷 唐詩按藻八卷

高士奇編士奇見經類

楚風補五十卷

廖元度編元度字大隱長沙人

四家詩鈔二十八卷

王企靖編企靖字苾遠雄縣人康熙乙丑進士官  
至江西巡撫

臣等謹按是編為清苑郭棻集六卷鉅鹿楊思聖  
集八卷任邱龐塏集六卷文安紀昀集八卷每集  
各為之序

瀛洛風雅九卷

張伯行編伯行見史類

歷朝賦楷八卷

王修玉編修玉字倩修錢塘人

檇李詩繫四十二卷

沈季友撰季友見詩集類

朱彛尊序曰往者蔣之翹輯檇李詩乘其卷帙之  
富什倍朱翰英華當從雁川訪求之其身甫歿而  
遺稿已化為蛛絲蟬粉他若劉常武原集徐贊宸  
之海谷遺風一時轉相鈔撮流布未廣洊經歲月

亦幾幾有失傳之患季友辭世已十有餘年同里  
金南瑛校而刻之庶幾其傳可永矣

于野集七卷

王原編原號西亭青浦人康熙戊辰進士官至給  
事中

唐宋十大家全集錄五十一卷

儲欣編欣見經類

欣自序曰即茅坤唐宋八家文鈔所評論以窺其

所用心大抵為經義計耳予欲破學者抱匱守殘之見所錄加倍焉至增入習之可之似屬創見然大家豈有定數可以八即可以十

臣等謹按欣論茅坤之說良是然亦不離乎經義之計伏讀

御製唐宋文醇序文嘉欣用意之美而惜其學識之未當所去取亦與茅坤等

聖諭持平欣亦何能置一辭矣

松風餘韻五十一卷

姚宏緒編宏緒號聽巖婁縣人康熙辛未進士官

翰林院編修

例畧曰是選七百餘家始張翰終葉有聲附以閨秀方外詩以姓叙姓以韻分有風雅萃於一門者即按世次列之又曰集內有鄙俚可笑者以采得不忍復逸存詩所以存其人也

臣等謹按是編專采松江詩人各系以小傳意在



博收故別擇未能精審焉

述本堂詩集十八卷

方登嶧式濟觀承撰登嶧字鳧宗號屏圻桐城人  
康熙甲戌貢生官工部主事坐事謫黑龍江卜魁  
塞式濟登嶧子見史類觀承登嶧孫見詩集類

唐四家詩八卷

汪立名編立名見經類

立名自序曰唐王孟韋柳四家為宋元人鼻祖學

宋元詩者當仍於唐詩求之故以此矯其弊云

八劉唐人詩集八卷

劉青夕選青夕名未詳淮安人

唐詩叩彈集十二卷續集三卷

杜詔杜庭珠同編詔見詩集類庭珠秀水人

古文雅正十四卷

蔡世遠編世遠見別集類

世遠自序曰康熙乙未歲自京師回閩家居數載

評選歷代古文自漢至元約二百三十餘首雍正  
元年入京與同志李立侯張季長參論考訂又是  
正之高安朱軾迨季長作令長洲取以授梓因為  
序之曰是選也採之各家文集者若干篇採之二  
十一史者若干篇若文選文苑英華唐文粹宋文  
鑑元文類以及歷代名臣奏議偶有所喜則登之  
文雖佳非有關於修身經世之大者不錄也言雖  
切而體裁不美備則賢哲格言不能盡載也其事

則可法可傳其文則可歌可誦然後錄之不及三  
傳檀弓者檀弓經也三傳雖傳經也不及戰國策  
者多機智害道也嗚呼虛車之飾與犬羊之羣交  
譏也不加體察躬行之功徒誇閎博雕鏤之用先  
儒之所羞稱言不能以足志文不能以行遠亦大  
雅之所弗尚也措之為君臣父子夫婦昆弟朋友  
之倫發之有經國大業不朽盛事之美言為心聲  
詞尚體要斯集之所由選乎名之曰雅正者其詞

雅其理正也

臣等謹按是集以理為根柢以詞為羽翼而語錄之體浮艷之詞概從刪汰良由世遠邃於學問深明文章正變之繇故所選錄傳誦藝林洵足為古文家正則也

明文遠

無卷數

徐文駒編文駒見別集類

尺牘嚶鳴集十二卷

王相編相字晉升臨川人

絕妙好詞箋七卷

查為仁厲鶚同撰為仁字心穀號蓮坡宛平人康熙辛卯舉人鶚見史類

鶚自序曰絕妙好詞七卷南宋周密所輯多紹興迄德祐間人自二三鉅公外姓氏多不著為仁耽玩倚聲披閱之下隨筆劄記輯有詩餘紀事如干篇於是編特為之箋不特諸人里居出處十得八

九而詞中之本事詞外之軼事俱攬拾無遺焉

元詩選一百一十一卷

顧嗣立編嗣立見詩集類

文章鼻祖六卷

楊繩武編繩武字文叔長洲人康熙乙未進士官

翰林院編修

鄱陽五家集十五卷

史簡編簡字文令鄱陽人

臣等謹按是編輯自宋末至明初其鄉人中黎廷瑞吳存徐瑞葉蘭劉炳五家之詩

南宋雜事詩七卷

沈嘉轍吳焯陳芝光符曾趙昱厲鶚趙信等同撰  
嘉轍字藥城焯字尺鳧曾字幼魯由薦舉官至戶  
部郎中皆錢塘人鶚見史類芝光字蔚九昱字功  
千信字意林皆仁和人

二家詩鈔二十卷



邵長蘅編長蘅見別集類

臣等謹按是編專選王士禎宋犖之詩然犖詩實遜於士禎故論者頗以並選為未協

棟華書屋近刻四卷

朱湘朱絳朱綱撰湘綱俱見詩集類絳字子桓由貢生官至廣東布政使

誠求堂彙編六卷

徐開錫撰開錫字定山常山人康熙中貢生官至

彰德同知

明文在一百卷

薛熙編熙見子類

漢詩說十卷

費錫璜沈用濟同編錫璜字滋衡吳江人用濟字

方舟錢塘人

嶺南五朝詩選二十五卷

黃登編登字俊升號積菴番禺人

臣等謹按是編前二十卷為第一帙皆載詩之為  
粵東作者後十五卷為第二帙皆粵東人詩其第  
一帙謂之名宦然如杜審言宋之問沈佺期輩其  
事具著唐書登以名宦稱之謬矣

義門鄭氏奕葉吟集七卷 義門鄭氏奕葉集十  
卷

鄭爾垣編爾垣字一樞浦江人

臣等謹按是集乃輯其先世詩文都為二編上編

係詩七卷下編則遺文十五種鄭氏自宋建炎至  
明初同鑿者十三世故稱義門

宋十五家詩十六卷

陳訐編訐見經類

臣等謹按十五家者梅堯臣歐陽修曾鞏王安石

蘇軾蘇轍黃庭堅范成大陸游楊萬里王十朋朱  
子高翥方岳文天祥也每集各繫小傳及前人詩  
話而以已所評論附焉

篤叙堂詩集五卷

許豸許友許遇許鼎許均許蓋臣許良臣等撰豸  
字玉史侯官人崇禎辛未進士官至浙江提學副  
使友字介有號甌香豸子遇字不棄號月溪友子  
官陳留長洲二縣知縣鼎號梅崖均號雪邨皆遇  
子蓋臣號秋泉良臣號石泉皆鼎子

續姚江逸詩十二卷

倪紀宗編紀宗字漫野餘姚人官遂安訓導

韜光菴紀遊集

無卷  
數

釋山止編山止西湖韜光菴僧

興善寺歷代名賢留題集二卷

釋淨溥編

倪城風雅二卷

勞嶠編嶠見詩集類

渠風集畧七卷

馬長淑編長淑字漢荀安邱人雍正庚戌進士官

至磁州知州

臣等謹按安邱古渠邱地故名曰渠風長淑因其里人張貞欲輯同邑諸人詩而未就乃踵成之

七十二峯足徵集一百一卷

吳定璋編定璋字友篁吳縣人

選詩定論十八卷

吳湛撰湛字伯其號冉渠睢陽人

文選音義八卷

余蕭客撰蕭客見經類

明倫初集五卷續集五卷

鄭文炳編文炳字慕斯莆田人

長林四世弓冶集五卷

林其茂編其茂見詩集類

宋百家詩存二十八卷

曹庭棟編庭棟見經類

廣東詩粹十二卷



梁善長編善長字崇一順德人乾隆己未進士

莆風清籟集六十卷

鄭王臣編王臣字慎人一字蘭陵莆田人乾隆辛

酉拔貢生官至蘭州府知府

臣等謹按是集選興化一府自唐以來之詩并綴以自著蘭陔詩話

山左明詩鈔三十五卷

宋弼編弼字仲良德州人乾隆乙丑進士官至甘

肅按察使

豐陽人文紀畧十卷

聶芳聲編芳聲字晦之永豐人

南園後五子詩集二十八卷

陳文藻等編氏籍未詳

臣等謹按南園在廣州城東南大忠祠側即抗風  
軒明初孫黃趙介李德黃哲王佐唱酬於此稱南  
園五子是編所云後五子者乃明順德歐大任梁

有譽從化黎民表南海吳旦番禺李時行五人也

二南遺音四卷

劉紹攸編紹攸見經類

崇川詩集十二卷

孫翔編翔字呂溪南通州人

東臯詩存四十八卷

汪之珩編之珩字楚白如皋人

臣等謹按是編專輯自宋至今如皋一邑之詩而

已作乃多至二百餘首

濮川詩鈔三十五卷

不著編輯者姓氏

閨秀集初編五卷

季嫺編季嫺字靜舛興化女子適李氏

磁人詩十卷

楊方晃編方晃見史類

晚唐詩鈔二十六卷

查克宏編克宏海寧人

友聲集七卷

賴鯤升編鯤升字滄嶠會昌人

殘本湖陵江氏集五卷

江八斗編八斗字四達號鈍夫貴溪人

臣等謹按八斗始祖公榮遷居貴溪湖陵其後仕

宦頗盛世為湖陵江氏是編乃輯其先世以來詩

文也

右總集

剡源文鈔四卷 金石要例一卷

黃宗羲撰宗羲見經類

宗羲自序金石要例曰潘蒼崖有金石例大段以  
昌黎為例顧未嘗著為例之義與壞例之始亦有  
不必例而例之者如上代兄弟宗族姻黨有書有  
不書不過以著名不著名初無定例故摘其要領  
稍為辨正所以補蒼崖之缺

詩辨坻四卷 填詞名解四卷

毛先舒撰先舒見經類

陸圻序詩辨坻曰楊子之目方言如鼠坻牛場用則實五稼飽邦民不用遂為糞壤抵之於道是書殆取義於此

李義山詩注三卷補注一卷

朱鶴齡撰鶴齡見經類

杜詩說十二卷

黃生撰生見經類

東坡養生集十二卷

王如錫編如錫字武工江寧人

歷代詩話八十卷

吳景旭撰景旭字旦生歸安人

溫飛卿集箋注九卷

顧予咸補明曾益注予咸字小阮長洲人順治丁

亥進士官至吏部考功司員外郎



蠓齋詩話二卷

施閏章撰閏章見史類

漫文說詩一卷

宋榮撰榮見史類

臣等謹按是編乃其詩話已載入西陂類稿中

讀詩堂杜詩註解二十卷

張潛撰潛字上若磁州人順治壬辰進士官翰林

院庶吉士

宋肇序曰杜詩評點自劉辰翁始顧劉亦無註元  
大德間有高楚芳者又刪存諸註附之向見今千  
家注本凡分註句下或綴篇下而不著姓氏者悉  
屬劉評第刊落圈點耳是注能疏千家之踳駁間  
亦伙以近代諸名人庶幾萃諸家之長而擅其勝  
者

然脂集例一卷

王士祿撰士祿見史類

臣等謹按其弟士禎書年譜後曰先生著書惟然  
脂集二百三十餘卷條目初就蓋為之未成僅存  
此例十條也古今閨閣之文選本殊嫌猥雜士祿  
此例條理差為可考云

漁洋詩話三卷

王士禎撰士禎見史類

圍爐詩話八卷

吳喬撰喬字修齡崑山人

韓集點勘四卷

陳景雲撰景雲見史類

杜詩論文五十六卷

吳見思撰見思字齋賢武進人

聲調譜一卷 談龍錄一卷

趙執信撰執信見別集類

臣等謹按執信嘗問聲調之法於王士禎士禎靳  
不與語乃以古詩唐詩互相鉤稽而得之因著為

聲調譜一卷法律頗為精密談龍錄者因士禎與  
門人論詩謂當如雲中之龍時露一鱗片爪因作  
此書以詆其說大旨謂詩中當有人在不當為縹  
渺無著之語實足救士禎末派之弊也

四六金針一卷

陳維崧撰維崧見史類

詩話八卷 詞話二卷

毛奇齡撰奇齡見經類

臣等謹按奇齡以考據為長詩文非其能事惟填詞之功較深於詩故詩話皆務為高論不得要領詞話深明原委足備倚聲家之談資

詞苑叢談十二卷

徐鉉撰鉉字電發號虹亭吳江人康熙己未

名試博學鴻詞授翰林院檢討

尤侗序曰侗嘗纂明史藝文志其以詩話著者西涯昌穀而下數十家而詞話自升菴之外無聞焉

古今詞話久已失傳其軼時見於他說鈇向曾續  
孟榮本事詩今又輯成詞苑叢談一書蓋撮前人  
之標而搜新剔異更有聞所未聞者夫詩之有話  
猶史之有傳也詩既有史詞獨無史乎哉願以傳  
之海內且為他日藝文志中增一則也

江南通志曰鈇少刻菊莊樂府朝鮮貢使仇元吉  
見之以金餅購去貽詩曰中朝攜得菊莊詞讀罷  
烟霞照海湄北宇風流何處是一聲鐵笛起相思

東林藝簣一卷

談遷撰遷見史類

杜詩會粹二十四卷

張遠撰遠字邇可蕭山人由貢生官縉雲縣教諭  
臣等謹按康熙中有兩張遠其著超然詩集者為  
侯官人此即朱彞尊曝書亭集內有送之桂林詩  
者也

香山詩鈔二十卷



楊大鶴編大鶴字芝田武進人康熙己未進士官  
至左春坊左諭德

杜詩闡三十三卷

盧元昌撰元昌見經類

元昌自序曰杜詩有因注而顯者有因注反晦者  
一晦於訓詁之太雜一晦於講解之太鑿一晦於  
援引之太繁反是者又為膚淺凡庸之詞曰吾以  
杜注杜也則太陋

李義山文集箋注十卷

徐樹穀箋徐炯注樹穀字藝初康熙乙丑進士官  
至山東道監察御史炯字章仲康熙壬戌進士官  
至直隸巡道皆崑山人

例畧曰舊唐書李商隱本傳有表狀集四十卷新  
書藝文志樊南甲集二十卷乙集二十卷又賦一  
卷文一卷宋史文集八卷四六甲乙集四十卷別  
集二十卷散佚既多炯乃取文苑英華唐文粹御

覽玉海諸書所載合而錄之其僻隱未能注者僅  
二十餘條而箋則樹穀所成參之史傳考證時事  
焉

杜詩詳注二十五卷附編二卷

仇兆鼇撰兆鼇字滄柱鄞縣人康熙乙丑進士官  
至吏部侍郎

康熙三十二年兆鼇進表畧曰本年孟夏之月伏  
蒙

皇上諭翰林諸臣所著詩古文章鈔錄呈進以備

御覽臣謹錄三載以來所著杜詩詳注呈進者解杜諸家  
非不各據心力意本淺而鑿使深事本近而推使  
遠引證者汭流而忘源採撫者得此而遺彼從前  
注解不下百家近日疏箋亦將十種臣惟少陵詩  
集實堪論世知人可以見開元天寶盛而忽哀之  
故可以見乾元大厯亂而復治之機兼四始六義  
以相參知古風近體為皆合愚蒙一得冒達

九重倘邀清暇之鑒觀以當采風之陳獻

陶詩箋五卷

邱嘉穗撰嘉穗見經類

補注東坡編年詩五十卷

查慎行撰慎行見經類

例畧曰王注譌謬施注亦有未愜今準藥城集按  
年編次又曾與東坡贈答之文潞國張宣徽文湖  
州至方外之辨才參寥有專集者悉采其詩附本

篇末或有集而不傳傳而不遠如劉景仁錢穆父  
孫莘老李公擇陳舜俞王仲玉胡完夫蔣穎叔王  
定國魯元翰王晉卿趙景貺柳子玉周開玉亦偶  
得一二焉始於康熙癸丑積三十年乃成於人地  
時事獨詳年表冠之其末二卷則互見他集  
玉臺新咏箋注十卷 庾開府集箋注十卷 徐  
孝穆集箋注六卷

吳兆宜撰兆宜字顯令吳江諸生

李太白詩集注三十六卷 李長吉歌詩彙解五

卷

王琦撰琦字琢崖錢塘人

庾子山集注十六卷

倪璠撰璠見史類

陶詩彙注四卷

吳瞻泰撰瞻泰字東巖歙縣人

說詩樂趣二十卷附偶咏草續集一卷

伍涵芬撰涵芬見子類

文心雕龍輯注十卷

黃叔琳撰叔琳見經類

柳亭詩話三十卷

宋長白撰長白原名俊以字行山陰人

原詩四卷

葉燮撰見史類

杜律疏八卷 玉臺新咏考異十卷



紀容舒撰容舒見經類

容舒自序杜律疏曰注杜詩者數十家於作者之意未必一一有當念杜詩為人所習誦者律句為多因取顧宸所解者叅以諸家之說逐句詮釋其體蓋近於疏云

宋詩紀事一百卷

厲鶚撰鶚見史類

鶚自序曰宋承五季衰敝後其詩與唐在合離之

間而詩人之盛視唐且過之前明諸人剽擬唐人  
太甚凡遇宋人集概置不問迄今留傳者僅數百  
家即名公鉅手亦多散逸無存江湖林藪之士更  
無論也鸚以為宋人考本朝尚有未當如胡元任  
不知鄭文寶仲賢為一人注蘇詩者不知歐陽開  
非文忠之族方萬里不知薛道祖非昂之子以至  
阮閱休所紀三孝定王伯厚所紀兩曹輔之類非  
博稽深訂烏能集事因訪求積卷兼之閱市借人

歷二十年之久披覽既多頗加汰擇計所鈔撮凡三千八百一十二家畧具出處大概綴以評論本事咸著於編其於前宋知人論世之學不為無小補矣

臣等謹按鶚裒輯詩話勒為是書仿計敏夫唐詩紀事之例亦以紀事為名而多收無事之詩旁涉無詩之事體裁殊失斷限舛訛處亦復不免然蒐羅賅備實為有宋一代詩話之淵海其用力之勤

亦足多矣

古今詞話六卷

沈雄纂雄字偶僧吳江人

古今詞論一卷

王又華撰又華字靜齋錢塘人

春秋詩話五卷

勞孝與撰孝與字巨峯一字阮齋南海人官鎮遠

縣知縣

臣等謹按是編專輯左氏傳之言詩者故曰春秋詩話然於傳文詩義實兩無所取焉

鐵立文起二十二卷

王之績撰之績字懋功宣城人

學稼餘譚三卷

不著撰人姓氏前題云櫟社老人輯

全閩詩話十二卷 五代詩話十卷

鄭方坤撰方坤見經類

方坤自序五代詩話曰五季兵戈之際風雅衰微  
談藝至此等諸季札觀樂自鄙無譏已矣然自光  
化天復以來下逮乾德建隆之際首尾六七十年  
中間建國立名號者且以十計短什長吟亦復多  
如東筍上者引商刻羽次者嘲風弄月以至詞人  
之賦狎客之篇縑黃淡泊之音金粉纏綿之作莫  
不有賸句之可採與本事之堪傳彙而核焉亦知  
人論世之一助也向聞王士禎尚書有五代詩話

金  
卷二  
三十一  
未經鏤板近始鈔得知為士禎暮年手輯未及成  
書輒據此為藁本複者芟之舛謬者訂之更抄撮  
羣言增益其所未備辨香可接倘亦前賢之所心  
焉許乎

榕城詩話三卷

杭世駿撰世駿見經類

臣等謹按雍正壬子乙卯二科嘗以鄰省舉人充  
鄉試同考官故世駿以甲辰舉人得與福建同考

之役輯為是編即以榕城詩話為名

讀杜心解六卷

浦起龍撰起龍見史類

王右丞集箋注二十八卷附錄二卷

趙殿成撰殿成字松谷仁和人

例畧曰向見摩詰集有廬陵劉須溪武陵顧元緯  
勾吳顧可久吳興凌初成四家刻本劉本較善然  
所載僅三百七十一篇則非寶應中進御原本矣



是編自四十卷以前皆劉本所有者雖間雜他人之作然不敢損益其別本所增及他籍互見者另為外編一卷卷首則弁言十九條王縉進集表代宗批答及本傳太平廣記冊府元龜所載惟逸事卷末則畫學秘訣關中石刻雖係後人偽造而援引者多故姑存之

李紱跋曰松谷辨霓裳七疊始有拍以馭按樂圖妄說可糾新舊二書之謬

樊紹述集注二卷 玉川子詩集注五卷

孫之騷撰之騷見經類

西崑發微三卷

吳喬撰喬一名及字修齡太倉人

臣等謹按楊億西崑倡酬集序稱取玉山冊府之

義名曰西崑是編所說李商隱詩而標題云云一

似西崑之名由商隱而得者則不知其何所據也

石總集類文史

皇朝文獻通考卷二百三十八

欽定四庫全書

史部

皇朝文獻通考卷二百

三十九  
四十

中書<sub>臣</sub>張經田覆勘

總校官檢討<sub>臣</sub>何思鈞

欽定御庫全書

皇朝文獻通考卷二百三十九

帝系考一

臣等謹按周官小史奠繫世辨昭穆帝系所由昉也司馬遷史記立世表自黃帝以下譜之自時厥後史表或立或缺不一要夫紹統歷年以及宮中之位號傳世之本支按表而稽斯可指數馬端臨師其意倣王溥唐及五代會要之體首叙帝王之

姓氏出處及其享國之期改元之數以及各代之  
始終次及后妃皇子公主皇族其可考者悉著於  
篇前此續編通考自宋迄明並循斯例欽惟

國朝肇基東土奄有方夏

聖神繼承流長源遠加以

宮庭翊贊德懋祉綏丕集純釐益昌景運臣等奉

命恭閱宗人府尊藏

帝系

玉牒

國史館

列祖實錄本紀暨我

皇上記注諭旨敬謹編纂依馬端臨通考五朝續通考  
分類名目釐為七卷式彰

洪庥傳於奕世焉

帝號歷年

臣等謹按我

朝誕膺

天眷肇啓

皇圖自

先世發祥長白山之陽

靈符神貺丕著休徵洎乎

聖聖相承宏闢疆宇寢熾寢昌垂裕大統恢億萬年無疆

之祚猗歟盛哉亘千古而配兩儀矣臣等恭遵宗

人府



帝系敬謹編纂用昭

列聖億萬斯年垂裕盛軌云

皇始祖肇祖原皇帝姓愛新覺羅氏崇德元年四月丙戌  
追尊曰

澤王順治五年十一月戊辰恭上

尊號

尊諡

興祖直皇帝

肇祖原皇帝曾孫崇德元年四月丙戌追尊曰

慶王順治五年十一月戊辰恭上

尊號

尊諡

景祖翼皇帝

興祖直皇帝第四子稱寧古塔貝勒崇德元年四月丙戌

追尊曰

昌王順治五年十一月戊辰恭上

尊號

尊諡

顯祖宣皇帝

景祖翼皇帝第四子崇德元年四月丙戌追尊曰

福王順治五年十一月戊辰恭上

尊號

尊諡

太祖承天廣運聖德神功肇紀立極仁孝睿武端毅欽安

弘文定業高皇帝

顯祖宣皇帝長子

聖母宣皇后誕生稱聰睿貝勒癸未

高皇帝起兵削平諸國丙午蒙古五部落來朝尊

高皇帝曰

神武皇帝鴻勳克集帝業已成貝勒大臣勸進丙辰正月

壬申朔恭上

尊號曰

覆育列國英明皇帝建元天命十一年八月庚戌

上賓

聖壽六十有八在位十有一年崇德元年四月丙戌恭上  
尊諡曰

承天廣運聖德神功肇紀立極仁孝武皇帝廟號

太祖康熙元年四月丙辰加上

尊諡曰

承天廣運聖德神功肇紀立極仁孝睿武弘文定業高皇

金史紀事本末卷二十九  
帝雍正元年八月己酉加上

尊諡曰

承天廣運聖德神功肇紀立極仁孝睿武端毅弘文定業  
高皇帝乾隆元年三月乙巳加上

尊諡曰

承天廣運聖德神功肇紀立極仁孝睿武端毅欽安弘文  
定業高皇帝

恭加上

太祖承天廣運聖德神功肇紀立極仁孝睿武端毅弘文  
定業高皇帝尊諡冊文曰

聖德誕敷肇啓萬年之統緒

神功丕煥弘開百世之昇平垂大業於無窮奉鴻名於有  
永欽惟

太祖承天廣運聖德神功肇紀立極仁孝睿武弘文定業  
高皇帝

智勇性成

聰明天縱

體元立極建經天緯地之功

應運綏猷擴物與民胞之量

聲教訖於九有文德遐宣

威靈懾乎萬方武功遠震

決機制勝成算如神

置腹推心求賢若渴啓疆宇而立

宗廟制度恢弘相原隰而定邦都規模久遠文同倉史爰



造國書義取卦圖聿修軍制致人心之僎應承

天命之維新緬惟

垂統訐謨發祥澤遠上溯開基厚德昌後功宏茲當續緒之初宜重追崇之典謹奉冊寶增上

尊諡曰

太祖承天廣運聖德神功肇紀立極仁孝睿武端毅弘文定業高皇帝伏冀

聖鑒長昭

弘庥永被貽博大昌明之運集山陵岡阜之祥

恭加上

太祖承天廣運聖德神功肇紀立極仁孝睿武端毅欽安  
弘文定業高皇帝尊諡冊文曰

天開泰運升日馭於東維

帝握乾符建斗樞於北極定萬年之統緒啓百世之昇平  
盛業常昭鴻名彌耀欽惟

太祖承天廣運聖德神功肇紀立極仁孝睿武端毅弘文

定業高皇帝

聰明天亶

智勇性成

大德體元參三才而正位

至誠立極用庶務以成能

緯地經天卜世之功日永

民胞物與肇基之迹方新

聲教訖於四方仰同光被

神武昭於九有望切來蘇合謳頌以歸心集賢才而佐治  
國書初設製字母以諧音軍制新頒按卦圖而取義  
際

天與人歸之會肇建邦啓土之勲造草昧而大經綸發祥  
自遠首庶物而膺圖籙裕後方長緬維

垂統之隆宜極尊崇之禮祇承丕緒敬考彝章謹奉冊寶  
增上

尊諡曰

太祖承天廣運聖德神功肇紀立極仁孝睿武端毅欽安  
弘文定業高皇帝伏冀

聖鑒長昭

皇圖永固益啓綿長之澤彌臻熙皞之風

建元一 天命十一年

太宗應天興國弘德彰武寬溫仁聖睿孝敬敏昭定隆道  
顯功文皇帝

太祖高皇帝第八子

聖母孝慈高皇后誕生稱貝勒天命十一年九月庚午朔  
嗣登大位改元天聰以明年為元年十年四月乙酉  
羣臣表上

尊號曰

寬溫仁聖皇帝建國號大清改元崇德八年八月庚午

上賓

聖壽五十有二在位十有七年是年十月丁卯恭上

尊諡曰

應天興國弘德彰武寬溫仁聖睿孝文皇帝廟號

太宗康熙元年四月丙辰加上

尊諡曰

應天興國弘德彰武寬溫仁聖睿孝隆道顯功文皇帝雍

正元年八月己酉加上

尊諡曰

應天興國弘德彰武寬溫仁聖睿孝敬隆道顯功文皇

帝乾隆元年三月乙巳加上

尊諡曰

應天興國弘德彰武寬溫仁聖睿孝敬敏昭定隆道顯功  
文皇帝

恭加上

太宗應天興國弘德彰武寬溫仁聖睿孝敬敏隆道顯功  
文皇帝尊諡冊文曰

聖人有作贊化育於兩間

至德難名耀聲華於萬世道光簡冊頌溢寰區欽惟



太宗應天興國弘德彰武寬溫仁聖睿孝隆道顯功文皇帝

覆載同規

中和建極

照臨六合亶成性之聰明

表正萬邦錫自天之勇智

布公誠以待下英俊歸心

施慈惠以寧人蒼黎向化

武功耆定雷霆驅精銳之鋒

文教弘敷日月炳光華之象修明禮制同倫軌於方輿綏輯要荒萃共球於屬國贊肇基之迹式廓

帝圖恢受命之符彌膺

天眷

耿光大烈已開一統宏模

厚澤深仁遂裕億年景祚欽承丕構緬懷

締造之猷思闡

鴻稱莫罄顯揚之願式稽古典爰合僉謀謹奉冊寶增上  
尊諡曰

太宗應天興國弘德彰武寬溫仁聖睿孝敬敏隆道顯功  
文皇帝伏冀

神靈陟降

緒業昭融恭承

烈祖之祚永篤曾孫之慶

恭加上

太宗應天興國弘德彰武寬溫仁聖睿孝敬敏昭定隆道  
顯功文皇帝尊諡冊文曰

神謨丕顯瞻陟降於在天

帝德誕敷仰光華於復旦長垂啓佑遠樹儀型欽惟

太宗應天興國弘德彰武寬溫仁聖睿孝敬敏隆道顯功

文皇帝

乾健偕行

離明普照

道兼作述繼鴻業以開太平

化洽寬仁慰羣黎而均覆幬

任英賢而圖治一德一心

定法制以宜民同倫同軌

文思廣被耀海隅出日之鄉

聖武布昭震漠外無雷之域決策而平遼右龍起雲從移

師以討朝鮮風行草偃三十五部咸抒貢琛獻賁之

誠億萬斯年永承

受錄膺圖之緒

大勲丕集皇哉迹廓肇基

景命維新赫矣功先定鼎鴻猷緯績崇

太室於不祧厚澤深仁覺

徽稱之莫罄式遵彝典爰合僉謀謹奉冊寶增上

尊諡曰

太宗應天興國弘德彰武寬溫仁聖睿孝敬敏昭定隆道

顯功文皇帝伏冀

耿光俯燭

繁祉鴻綏鑒繩武之微忱介錫齡之遐福

改元二

天聰十年崇德八年

天聰十年即崇德元年

世祖體天隆運定統建極英睿欽文顯武大德弘功至仁

純孝章皇帝

太宗文皇帝第九子

聖母孝莊文皇后誕生正月十三日

萬壽聖節崇德八年八月丁亥嗣登大位改元順治以明

年為元年時流寇肆逆明祚已終入關靖寇建都  
燕京天下傳檄底定六齡踐阼八年

親政十八年正月丁巳

上賓

聖壽二十有四在位十八年是年三月癸酉恭上

尊諡曰

體天隆運英睿欽文大德弘功至仁純孝章皇帝廟號

世祖雍正元年八月己酉加上



尊諡曰

體天隆運定統建極英睿欽文大德弘功至仁純孝章皇帝乾隆元年三月乙巳加上

尊諡曰

體天隆運定統建極英睿欽文顯武大德弘功至仁純孝章皇帝

恭加上

世祖體天隆運定統建極英睿欽文大德弘功至仁純孝

章皇帝尊諡冊文曰

聖德光昭長衍萬年之景運

神功奠定宜崇百世之鴻稱大一統以貽庥式九圍而立  
極功弘啓佑禮重顯揚欽惟

世祖體天隆運英睿欽文大德弘功至仁純孝章皇帝  
表正萬邦

首出庶物

精明果毅智勇本於性成

中正齊莊神靈由於天授擴

祖宗之弘業同軌同倫統華夏以歸心來王來享明裡昭  
事精誠允格乎

蒼穹

駿烈纘承孝享實孚於

清廟隆

慈闈之尊養視膳問安普宗族之恩施明倫敦本時

頒解澤大地迴春屢

諭祥刑普天向化登兆人於衽席躋寰寓於雍熙積十八載之惕厲憂勤開億萬年之豐亨豫大緬懷

盛德繩

祖武於方新祇述

鴻規詒孫謀於盡善謹奉冊寶增上

尊諡曰

世祖體天隆運定統建極英睿欽文大德弘功至仁純孝  
章皇帝伏冀

鑒觀有赫

默佑無窮永貽昌大之祥益啓昇平之祚

恭加上

世祖體天隆運定統建極英睿欽文顯武大德弘功至仁  
純孝章皇帝尊諡冊文曰

聖人首出開景運於萬年

至德光昭享鴻稱於百世式九圍而立極大一統以垂庥  
禮重顯揚業崇簡冊欽惟

世祖體天隆運定統建極英睿欽文大德弘功至仁純孝  
章皇帝

道貫百王

功垂萬世

照臨六合亶成性之聰明

表正萬邦錫自天之勇智敷同軌同倫之治肇造鴻基萃

來王來享之忱長貽燕翼敬

天而虔昭事允秉精誠法

祖而篤顯承聿彰仁孝奉

慈闈而侍養備極隆儀恤宗族以敦倫頻施曠典深仁厚  
澤率土均霑善俗宜民敷天共戴擴

祖宗之宏業統華夏以歸心受命則惕厲憂勤圖治於十  
有八載啓後則親賢樂利行慶於億萬斯年緬懷締  
造之謨欽承丕構莫罄頌揚之願敬薦徽稱謹奉冊  
寶增上

尊諡曰

世祖體天隆運定統建極英睿欽文顯武大德弘功至仁  
純孝章皇帝伏冀

鑒觀有赫

默佑無窮恭承

列祖之庥永篤曾孫之慶

改元一 順治十八年

聖祖合天弘運文武睿哲恭儉寬裕孝敬誠信中和功德  
大成仁皇帝



世祖章皇帝第三子

聖母孝康章皇后誕生三月十八日

萬壽聖節順治十八年正月己未嗣登大位改元康熙以  
明年為元年時八齡踐阼奉

世祖遺詔以四大臣輔政至六年七月己酉

躬親大政六十一年十一月甲午

上賓

聖壽六十有九在位六十一年雍正元年二月己巳恭上

尊諡曰

合天弘運文武睿哲恭儉寬裕孝敬誠信功德大成仁皇帝廟號

聖祖乾隆元年三月乙巳加上

尊諡曰

合天弘運文武睿哲恭儉寬裕孝敬誠信中和功德大成仁皇帝

康熙二十年十二月癸巳王大臣九卿等以滇逆

湯平請上

尊號

上諭大熟既除寰宇底定君臣之間宜益加修省恤兵養民布宣德化共致太平其上尊號之事斷不可行

二十二年十月丁未九卿等以海寇底定請上

尊號

上諭臺灣僅彈丸之地得之無所加不得無所損若稱尊號即入於矜張粉飾矣不必行

二十六年正月喀爾喀土謝圖汗察罕車臣汗諾爾布及七旗濟農台吉等請上

尊號

上諭喀爾喀諸汗貝勒等恪恭敬慎具悉惻忱宜仰體朕一視同仁無分中外至意謹識朕諭和之旨自茲以後無相侵擾親睦雍和永享安樂更甚於上朕尊號也所請不准行

三十六年六月庚戌王貝勒貝子公滿漢文武諸

臣及士民等以平厄魯特噶爾丹請上

聖神文武大德廣運尊號

上諭朕御極四十年自始至終孜孜不倦方今外寇既靖  
正宜休養生息徒加尊號何益於治不必行毋復再奏  
四十一年十二月壬辰王貝勒貝子公大學士九  
卿文武諸臣及士民等以明年

皇上五十萬壽請上

尊號

上諭朕即位四十餘年未嘗一刻不以民生休戚為念遠  
邇安寧為本若誇耀功德取一時之虛名大非朕意不  
必敷陳諸王大臣等再三奏請終不允

五十年三月庚寅王貝勒貝子公大學士九卿文  
武諸臣及士民等以恭遇

萬壽聖節請上

聖神文武大德廣運尊號

上諭朕自幼讀書歷觀經史持身務以誠敬為本治天下

務以寬仁為尚此心此念恪守五十年夙夜無間即纖悉細務不敢稍有怠忽朕之御極年久皆

祖宗厚德景福積厚留貽之所致至於請上尊號特虛文耳於朕躬毫無裨益所奏知道了

五十一年十一月己亥王貝勒貝子公文武諸臣等以明年

皇上六旬萬壽請上

聖神文武大德廣運尊號

上諭朕臨莅日久每於讀書鑒古之餘念君臨天下之道  
惟以實心為本以實政為務若侈陳功德加上尊號以  
取虛名無益治道朕所不喜前諸王大臣等屢有奏請  
朕曾手書批示諭以斷不允行前旨甚明所奏知道了

六十年三月己丑王貝勒貝子公滿漢大臣文武  
百官等請上

聖神文武欽明睿哲大孝弘仁體元壽世至聖皇帝尊號  
上諭從來所上尊號乃歷代相沿陋習本朝受命以來惟



以愛養萬民為務今當修省圖治加惠黎元所奏慶賀  
無益不准行

恭加上

聖祖合天弘運文武睿哲恭儉寬裕孝敬誠信功德大成  
仁皇帝尊諡冊文曰

乾符廣運超萬古而獨隆

鴻號丕昭配兩儀而並立

創垂永賴

巍蕩難名欽惟

皇考大行皇帝

道貫三才

恩涵九有

沖齡繼序肇增昭代之弘模

久道化成式廓熙朝之景運

敬

天

法

祖盡制盡倫濟世安民允文允武極孝思於尊養

郊

廟尤虔篤慈愛於宗支勲賢必恤用人立政欽明被四表  
之光赦罪蠲租怙冒溥萬方之澤禮樂興而刑罰措水  
旱弭而河嶽靈既好生之如天復神武而不殺兵威所  
指反側皆消

廟算在心遐荒永靖收歷代未收之屬國闢從來未闢之

輿圖治河則神謨捷於禹功

巡狩則懿德多於周頌

誕敷文教

幸魯而崇萬世之師

勤御講筵尊朱以表六經之學金聲玉振帝王集其大成  
精義入神道德通於游藝綜六十餘年之謨烈美不勝  
書稽三百一帝之簡編古來未有唯手定長治久安之  
天下而心懷憂勤惕厲以終身仰

靈爽之式憑考彝章而肆祀僉謂席守成而兼開創統中  
外以定太平

功高百世而不祧禮洽羣情而稱

祖

中和建極聖則大而化之

乾健體元仁者善之長也敬備顯揚於

君父敢申昭告於神明謹奉冊寶上

尊諡曰

合天弘運文武睿哲恭儉寬裕孝敬誠信功德大成仁皇  
帝廟號

聖祖於戲

秉謙德於生前屢辭

尊號定

徽稱於今日彌切追思伏冀於昭于天克昌厥後

紹庭陟降賴申錫於無疆

入廟顯承凜鑒觀之有赫永綏奕祀式荷

弘庥

恭加上

聖祖合天弘運文武睿哲恭儉寬裕孝敬誠信中和功德  
大成仁皇帝尊諡冊文曰

聖德同天駿烈常垂於百世

仁恩浹地鴻稱永著於千秋萬方之元化周流五紀之太  
和洋溢光昭啓佑禮重顯揚欽惟

聖祖合天弘運文武睿哲恭儉寬裕孝敬誠信功德大成

仁皇帝

道備中和

功隆化育

勵精圖治統經文緯武以宣猷

久道化成兼繼往開來而立極邁百王而獨盛廣運彌神

超千古以加隆大成集聖敬

天立政時時弗釋夫憂勤法

祖誠民事務歸於寬大定三逆而平絕塞克成不世之



膚功蠲舊賦而緩新徵疊沛無窮之惠澤六十一年  
宵衣旰食總萬幾而日昃不遑千八百國樂業安居  
熙庶績而耄期不倦溯自眇躬之沖幼即蒙鞠育於  
宮闈

聖訓親承憶音容而如昨

祖庭遠隔瞻色笑以何從敬紹丕基詒孫謀於盡善緬懷  
盛德崇顯號於方新式考典章肅將忱悃謹奉冊寶增上  
尊諡曰

聖祖合天弘運文武睿哲恭儉寬裕孝敬誠信中和功德大成仁皇帝伏冀

神靈陟降

緒業昭融永貽昌大之祥長享昇平之福

改元一 康熙六十一年

世宗敬天昌運建中表正文武英明寬仁信毅大孝至誠  
憲皇帝

聖祖仁皇帝第四子

聖母孝恭仁皇后誕生十月三十日

萬壽聖節康熙三十七年三月丁丑封

多羅貝勒四十八年十月戊午晉封

和碩雍親王康熙六十一年十一月辛丑嗣登大位改元

雍正以明年為元年十三年八月己丑

上賓

聖壽五十有八在位十三年是年十一月丁未恭上

尊諡曰

敬天昌運建中表正文武英明寬仁信毅大孝至誠憲皇  
帝廟號

世宗

恭上

世宗敬天昌運建中表正文武英明寬仁信毅大孝至誠  
憲皇帝尊諡冊文曰

至德同天裕鴻模於萬世

深恩浹地垂駿烈於千秋揚

顯號以薦徽稱考彝章而崇殷禮光照寶冊輝映瑤圖欽  
惟

皇考大行皇帝

道協清寧

功隆位育

敬

天而虔昭事孚精意於

郊壇

法

祖而篤顯承致孝忱於

廟祐紹中天之景運開奕代之昌期精一傳心建大中而  
出治蕩平立極居至正以表邦敷文則重道尊師宏  
作人之雅化振武則安邊懷遠恢保泰之神謨天亶  
聰明坐照靡遺於庶物性成英睿淵衷遠徹於萬方  
御衆以寬而蠲賦省刑共沐仁恩之浩蕩示民有信  
而敦化善俗咸欽毅力之甄陶蓋本

大孝不匱之思善繼以成夫善述且運

至誠無息之用實政而體以實心乃至瑞集苞符海宇之  
禎祥畢致誠輸職貢梯航之琛賁胥來而乃謙挹彌  
深憂勤益勵

朝乾夕惕弗釋一二日兢兢業業之心

旰食宵衣用成十三載蕩蕩巍巍之治樹百王之模範言  
言寶鑑丹書傳百代之章程事事金科玉律有典有  
則永垂裕於後昆是訓是行敬率由於成憲茲博詢

夫公議期允愜於輿情

尊諡

憲皇實符

盛烈載稽往籍式考禮經宗堯宗禹宗湯廟號宗尊於有  
德世道世法世則烝嘗世奉於不祧殷美三宗宜肇  
禋宗之典周崇世室爰開卜世之祥配

列祖於在天薦

世宗之新廟合朝野僉謀而悉協揆古今通議而交孚謹



奉冊寶恭上

尊諡曰

敬天昌運建中表正文武英明寬仁信毅大孝至誠憲皇帝廟號

世宗惟耿光大烈之常昭冀景福純庥之茂介伏祈  
昭格俯賜

鑒臨

改元一 雍正十三年

今上皇帝

世宗憲皇帝第四子

聖母孝聖憲皇后誕生八月十三日

萬壽聖節雍正十一年二月乙未封

和碩寶親王雍正十三年九月紹登大寶改元乾隆以  
明年為元年

乾隆十四年二月己亥王大臣等以平定金川請

上

尊號奉

旨不用

二十年五月乙未王大臣等以平準噶爾請上

尊號奉

旨不用

二十四年十月壬寅王大臣等以平回部請上

尊號

上諭諸王大臣等以巴達克山汗素爾坦沙投誠逆酋

小和卓木授首準噶爾全局大定具表奏賀並請加  
上尊號雖稱援據典章而朕功成祇懼彌切於懷豈  
肯崇尚虛文勉從所請西陲一事仰賴

上天福佑

宗社鴻庥殊勲速奏隸版籍者二萬餘里治軍書者不及  
五年載籍以來實罕有倫比而朕所深用愜心者乃  
不在遠圖之式廓而在

先烈之克成欽惟

皇考付畀朕躬夙夜勉圖繼述矧在蚤年備承

皇祖眷顧優隆每遇軍國重務即令面聆

聖訓籌畫是朕躬之仔肩倍重而續緒者亦倍艱今以數

載間運籌決策之勞克全我

兩朝撻伐綏遐之略返衷自問差可無負燕詒者當在於  
是故非好大喜功之為見也我

皇祖聖德神功超越萬古戡定殊勲炳於史冊廷臣請上  
尊號尚未允行乃者關門以西迄乎大漠雖通亘古未通

之境究以國家全盛餘力及之視當年之事會稍需  
刻難中輟者其緩急輕重固不可同年語矣然方其  
罪人未得朕斷不因盈廷畏憚輒事苟安若逆渠既  
獻馘告功則國法用申而軍威自無可極是以富德  
奏捷尚請追索鄂斯滿阿布都海里二人以絕根株  
朕以成事已歲即傳諭飭止之固不能惑於築室之  
謀亦豈或蹈夫佳兵之戒所謂行乎不得不行止乎  
其所當止無成心也茲功成事定惟欽遵

祖宗之心法益深兢業耳所有王大臣等加上尊號之請  
不必行

皇朝文獻通考卷二百三十九